

MVNA bantu mangsa api, keluarga atasi trauma

Kuala Lumpur: Tragedi kebakaran Pusat Tahfiz Darul Quran Ittifaqiyah terus mendapat perhatian pelbagai pihak untuk menghulurkan sumbangan dan kepakaran masing-masing bagi membantu mangsa dan keluarga yang masih trauma dengan kejadian itu.

Terkini adalah Persatuan Jururawat Sukarelawan Malaysia (MVNA) tampil menghulurkan kepakaran mereka dalam bidang perawatan kejururawatan dan kesihatan mental bagi memulihkan mangsa dan keluarga terbabit selepas tragedi yang meragut 23 nyawa itu.

Presiden MVNA, Rozainah Mat Yusoff, berkata persatuan dianggotai jururawat profesional itu bukan saja akan menyumbangkan kepakaran, tetapi memberikan sokongan emosi, psikologi dan spiritual mengikut keperluan mangsa.

Katanya, daripada pengalaman pihaknya terhadap mangsa kejadian seperti ini, mereka biasanya akan mengambil masa antara tiga hingga enam bulan untuk pulih sepenuhnya dan melupakan trauma yang berlaku, tetapi jika

tidak diberi perhatian awal, ia boleh menyebabkan keadaan psikologi yang lebih teruk.

“Sebab itu kami akan mengatur pertemuan dengan mangsa dan ibu bapa pelajar terbabit minggu depan untuk mengenal pasti bagaimana bentuk bantuan dan sokongan yang diperlukan mereka.

“Jika perlu, kami akan membuat kunjungan setiap minggu disertai sekurang-kurangnya tiga ahli MVNA yang juga jururawat profesional untuk memberikan khidmat secara berterusan kepada mereka sehingga pulih sepenuhnya,” katanya yang dihubungi BH, semalam.

Memahami gangguan emosi mangsa

Rozainah berkata, kesediaan untuk membantu mangsa dan keluarga sudah dimaklumkan kepada pengetua pusat tahfiz itu, Mohd Zahid Mahmood, dalam lawatan MVNA ke Pusat Tahfiz Darul Quran Ittifaqiyah, hujung minggu lalu.

Beliau berkata, MVNA turut menghulurkan sumbangan jumlah wang tunai dan barang keperluan kepada pusat tahfiz itu.

Info**MVNA**

- Ditubuhkan pada Jun 2017
- Dianggotai jururawat profesional dan yang setaraf dengannya

→ **Objektif utama** sebagai saluran jururawat melakukan kerja kebajikan kepada masyarakat



Rozainah (dua dari kiri) menyampaikan sumbangan kepada Mohd Zahid ketika melawat Pusat Tahfiz Darul Quran Ittifaqiyah.